



Няврэм леккара рупитты нэ

3»

Хор: Мария Максарова

Вулэң ёх Кева ёхатсат

Дорвош па Кев сыд районатан улты вулэң ёх ун кер тылац соханты хатлатан луң улты тахайдала касалты питсат. Ин пи Кева лепа ванамасат: хой лыпийн лойты питлат, хой па тум пелка манлат.

Мелак хатлат одна Дорвош район хоца ёхатсат. Щипан сельскохозяйственной предприятие «Мужевское» хоца улты вуды тащат Кева пела едпи манты актацсат. Хоты вулэң ёх верат манлат, вулэт яммалты леккар куца ху, Алексей Озелов каматса ясаң ястас: «Муң хоцаев няд вулэң тащ ул. Товийн, касалты елпийн, луңтам щиран тащлуд хоца ветлэм щёрас вуды ул. Шоши вулэт пилан нийлкем щёрас хойд. Товев яма манас па тащлуд лэвман усат. Суов омасты тылщев сохнас, нэ вулэт ар пелак пошхаңа йисат.

Олаңмет тащев мет уншак, щита кушая Виталий Озелов ул.



Хор: Михаил Озелов

Сельскохозяйственное предприятие «Мужевское» олаңмет тащ хоца рупитты ёх.

Ин лув Ун Лохорта ёханан, Кева лыпийн лойлат. Холна каматса пуш касалдат па па пелка питлат. Кимет тащев хоца Евгений Талигин кушая понман ул. Лув Кева тум пелка питсат – Омрац (Грубею) ёхан хоца лойлат. Вячеслав Лонгортов хулмет тащ куца

ху ястас – ин лув Юхаң кевн лойлат, еша рондат па Кева лыпия касалдат, щита лойты питлат. Нялмет тащев касалты юшел мет нум пелак элты манал. Щита кушая Станислав Лонгортов понман ул. Лув ищи Кева лыпийн луң сыс лойты питлат».

ООО «Сельскохозяйственной предприятие «Горковское» хоца ищи няд вулэң тащ ул. Щит элты муцев вуды леккар Руслан Нева айкел верас: «Муң тащлуд иса Кева уншасат. Карты юш леп улдат. Полярный Урал нэмпи станция пуңалан 1-мет па 2-мет тащат лойлат. Щита Пётр Сязи па Константин Серасхов бригадирата рупитлаңан. Николай па Олег Максаровчан 3-мет па 4-мет тащлуд Хорота станция лепан шавилдал. Ин каңаңлуд лэдат па щутцилат».

Уц тылац кутап хатлат кеша вуды леккарат Кева пела манлат. Кашң вуды тащ лувилал ванттыя па луңаттыя мосал. Щит элты ныты питла, хоты товев манас па муй арат суов сэма питас.

Иван Сандрин ханшам потар



Хор: Михаил Артанеев

Луң сыс худ велпаслаты пора пуншса

Дорвош, Кева сыд па Надымской районатан луң велпаслаты пора питсас. Округев ялап худан сопаслаты ураңан, худ велты хоятат хоплал лэссят, велпаслаты тахайдала касалсат, олаң холаплад эсалсат.

Надымской па Дорвош районанан кашң велпаслаты панан худ мосятты хоятлуд рупатая этсат. Кева сыд районан ин анта кашң тахайн худ велпаслаты рахал. Пулңават вош элты Сандиба нёлтай унты худ мосятты ант рахал. Худ велпаслаты ёх ин послатан, ёхан лухатан, лоратан холаплад омаслат. Ар пелак питы худ мосятла.

Дорвош район АО «Горковский рыбозавод» олаң хатлат элты мет ар – лапатяң пела няд тонна худ мосятсат. Ар пелак сорт па мевты. Надымской районан, хасям таҕ пилан арталаман, тампуш худ велты ёх алаңшак велпаслаты этсат. А.В. Бородина нэмпи крестьянско-фермерской хозяйство онтасан, олаң хатлат элты худ мосятты питсат.

Кева сыд районан, сикуш ар пелак тахаятан худ велты ант рахал, иси па ёлта ант хасьлат. Худ маты рыбозаводат куган «Аксарковское РПП» хулмет тахайн, яң тонна худ мосятсат.

Альбина Тырлина ханшам потар



Хор: Альбина Тырлина

«Овс мув ольпат»

Щимащ нэмпи касася Ямал мувеван улты няврэмат кеша лэщатыса. Ущ тыдащ олаңмет хатадан Мув ловатан улты няврэмат емаң хатл постатын альса, маты няврэмат мет хорамаң хорат па ошаң ясңат ханшсат.

Овс мув шимдаң мир хоятат департамент «Полярные краски» нэмпи касася кашң тал лэщатыйд. Яң тал элты па нийлхус тал доват унты кашң няврэм рупатайдад китты верытас. Касася щиран хорам хор щуратты па щит элты потар ханшты мосас. Щи кеша хут номинаций лэщатман ус.

Тампуш 43 няврэм рупатайдад арсыр мувлув элты китылыслад – щит Ямальской, Тазовской, Красноселькупской, Пуровской, Лорвош па Кев сыд районат. Надым па Пулңават вошңан

няврэмат ищи лэщатам хордал альсалдал.

Касася китам хорат кутан нялхощяң рупата ханты няврэматан лэщатман ус. Маты номинацияйн лув нох питсат.

10-14-мет тал доват няврэмат кутан:

- «Семейные традиции» – Юрий Худи (Охсар вош);
- «Чумовая история» – Анна Талигина (Овкурт);
- «Традиционные игры и игрушки» – Людмила Вэненго (Охсар вош);
- «Формула здоровья» – Виктория Вальгамова (Овкурт);
- «Мелодии дружбы народов» – Мирослав Нахрачэв (Ващъеханов);

Уншак няврэмат, 15-18-мет тал доват няврэмат элты туп Филипп Сязи (Питлор) «Тра-



Хор: Мирослав Нахрачэв

диционная одежда» номинацияйн кимет места шитас.

Кашң няврэм шитам мойлапсайдал лув улты вошлада па куртлада китдайт. Шеңк умащ вантты па луңатты, хун

поши няврэмат хорамаң хорат па ошаң потрат ханшлат. Ялпа этты газета ятан ханты няврэмат китам рупатайт пондалдув.

Иван Сандрин ханшам потар

Луң сыс хухатдыты пора

Яммалтыты па таксардыты Талэв кеша Ямал мувев доватан арсыр касасяйт вердайт. Хошам хатлат ёхатман, Ас нопатты тыдащ соханты хатадан Пулңаватан хухатдыты акция пуншса.

Хошам хатлат ёхаттын, хоятат артан ким этлат. Щиты «Геолог» нэмпи каш верты хот пуңалан каматса сот хоят уйтантысат. Лув анта ад щиты актащсат – нёхамтыты па хухатдыты ким этсат. Ай па ун хоятат иса лэщатысат «Ма пилэман хухла» акция хоца пилтащиман.

Щи хатадан Всероссийской велопарад хонна ус. Сот молтас хоят велосипедлад пилан каш верты хара ёхатсат. Ёхтам хоятат кеша хошмалтыты ураңна зарядка верса. Щалта па лув 2 щёрс 200 метра хухалсат. Лув юпелан ищи юш хуват велосипедан яңхты хоятат мантсат.



Хор: Андрей Ткачев

– Ма хув тэлан тамиты хухатдыты дойдыдам. Кашң алаңсахат хут щёсан нох килдам па яңкем километра хухалдам. Ма щиты улты уталсам, па щиран ант верытдам, – акция хоца пилтащийм Родион Талигин ястас. – Похием ищи щиты уталталэм. Лув ма педаем вантман, ищи нёхамтаты

па касты вуратал. Садик юпийн стадион хоца хухатдылман. Кум шитман, тхэквондо щиран юращты яңхламан.

Щимащ хухатдыты верат хоятата яммалтыты па таксара йиты нётлат. Нын ищи хухатдыты!

Иван Сандрин ханшам потар

Ялап нётосайн масайт

Округ доватан ялап тала питам вуш элты нялхощяң молтас сертификат лэтот ураңан мийман уса. Щи нётоса патлам хотаң нэңата, худам тала ант ювам няврэмата муй па мушаң няврэмата мада, хой хоттэл хоятэл СВО хоца ул.

Муй хорпи льготной категория лунтаслат, щи аратан маты питлайт. 800, 2000, па 6500 солкувая хойлат. Щи охатан рахал арсыр лэтот лутты, аратадан хускем. Муйт щий лоңалман улдайт, «Морошка» сайт хоца мосал лоңтыты па вантты.

Мосты лэтот рахал «Пятёрочка», «Детский мир» па «Озон» мохты лутты. ЯНАО социальной защита департамент сайтан шеңк яма ныда, камн солкувая лутам лэтотат хойсат, па камн солкува хонна хащас.

Тамаш нётоса 2023-мет тал элты рупитты питас. Щи вуш элты 80 щёрс молтас сертификат мийман уса. Там сыс Ноябрьск, Новый Уренгой па Надымской район щи нётоса шеңк яма вусат па посатсат.

Аллина Тоярова ханшам потар

Няврэмата маты мойлапсайт



Хор: Юлия Ефдокимова

Ущ тыдащ олаңмет хатл вуш элты унт лор соханты унты хошам муват педа тохлаң хопан манты няврэмат мойлапсайн маты питлайт. Сочи па Минеральные Воды юш хуват кат тал элты ихощяң тал унты ювам няврэмат ортлайт. Мет олаңмет хатадан 260 мойлапса маса.

Ветлэм щёс манты порайн тамаш пормасат няврэмата шеңк мослат. Ванты, манты сыс лув верытлат ёнтман омасты, молты хорат па потрат ханшты. Хораң журналат ванттэл порайн, лув округ улапса элты аршак уятты питлат. Луң сыс катсот молтас мойлапсайн рейс верда.

Аллина Тоярова ханшам потар

Няврэм леккара рупитты нэ

Там тал округеван яммалтыты па таксарлаты Тада постаман ул. Сишан тал сыс аршак леккар хоятат элты ханшты питлүв. Улдат симась леккарат, хойтат шеңк сэма ант хойлат. Хун наң, мосаң па рут хоятэн леккар хота понда, си порайн лувилал шиялаты рахал. Ханты хоятлүв кутан симась хоятат па улдат. Там лопасанан йи симась ханты нэ элты потрэм тулэм. Сит Марина Прокопьевна Максарова.

Ур хотан энмас

Марина Прокопьевна Пулңаватан ул. Ар тал ЯНАО клинической леккар хотан няврэм леккара (педиатра) рупитал, няврэмат яммалтал. Педиатрической отделение куся нэңа, медицинской наук кандидата ул. Мет ун квалификационной категория тайл. Лүв элтэд каматса ясаң ястас: «Ма ар тал Пулңават вошан улдам па рупитлам. Емаң хатлатан, сютсюты хатлатан иса рупатайн.

Ур хотна энапсам. Лапат тал унты ханты ясаңан туп потартсам. Ашкудая манмем порайн, русь ясаң ант уйтсам. Одаң классан туп кат тыдась усам. Си пора сыс азбука уталтасам. Нийлмет класс Питлдор куртан етшаптасам, ихосьяңмет – Лорвошан.

Аңкем-асем касдыман яңхсаңан. Асем Прокопий (Поронь) Герасимович Максаров. Аңкем Анастасия Архиповна Максарова. Тампуш 85-мет тада йис».

Уталтыты порайл

Ханты нэңев экономиста уталтыты утсийс. Туп манты юшад па сирн манас, леккара йис. Сит элты потрал ситы тус: «Ма си педа нумасман ант усам. Леккара рупитты номас ант тайсам. Си порайн шоши мир ёх департаментан молты программа ус.



Марина Прокопьевна аңкел-асел – Анастасия Архиповна па Прокопий Герасимович Максаровңан.



Марина Прокопьевна Максарова

Па вошатан уталтыты утситы няврэмат яха актыдысайт. Экзамен маты па вошата тутдысайт. Амуй йи няврэм си порайн ант ёхтас. Сишан ма вусайм. Аттестатэм вантса, туп вет па няд посат усат.

Москва воша тусаюв. Сита экзамендам масдам па ун вошан хасьсам. Катхосьяң тал уталтысам. Одаң медицинской факультет етшаптасам. Сялта няврэмат лечитты тахая мантсам. Кат тал ординатурайн, хулам – аспирантурайн. Си юпийн округева рупитты китсайм».

Хус молтас тал йи тахайн рупитал

Леккар нэңиев уталтыты етшамал юпийн, мохты Пулңавта ёхтас. Рупитты отделенияйн велси сэма питам щуциет элты нийлхус тал доват унты эвет па похат яммалдайт. Рупатайл элты тамиты потартас: «Хус молтас тал окружной леккар хотан няврэм отделенияйн рупитлам, педиатра улдам. Уталтымем порайн па рупитсам. Пил хоятэм иты учёной нэм тайлам. Ма медицинской наук, лув – филологической.

Ийикем – Олег Прокопьевич Сюгней. Лув округев хуват яма уятла. Нийлхус молтас тал шоши мир ёх департаментан рупитас. Хулам няврэм тайламан. Атэд мин уятлайман, яха па ант вантыдысайман. Емаң хатлатан яха яңхтэман, хоятат вуся вердат па инсясдат. Нын па муя яха яңхлаңан? Лув наңена хой?»

(Елды 4-мет лопасан лүңталн)

Альбина Тырлина ханшам потар



Хотгэд хоятлаң.

Марина Прокопьевна Эльвира апсел пидан Владислав яйел хося вуды хотан.

Хор: Марина Максарова

Хор: Татьяна Царшукова

Хор: Марина Максарова

Удапса яммалтаты уйтантапсайт

Там ванан мув па ладты шув сыстама тайты, Овс мув шимдаң мир ёх па вой-хул велпаслаты верат туты хоятат Кев сыд районан улты, тащ хотатан касалты па худ велпаслаты ёх пидан уйтантапсайт.

Иван Сакал едпи Кев сыд район кушая удмалан, рупитты хоятдал яма уйтдалды. Законодательной Собрание куша ху Сергей Ямкин там мувалан сэма питас па айтэдан там мув удапса уятал.

Тащ шавиты, вой-хул велпаслаты ёх пидан уйтантапсайт, лув удапсаел па рупатаел дыпалта вантлэл. Мосты верат постаты ураңан мохет иншасапса нэпекат ханшлат. Ханшам потрат щаха яха акатдайт па «дорожной карта» дыпия лоңалдайт.

Кев сыд мохет пидан уйтантапсимедан, тут йиңк тын, айкел



Хор: Александр Тесленко

китты па потрэмиты спутниковою хошапат элты потар манас. Рупитты ёх иншасапсайт, нэтапса пормас вуты вер элты уйтлат, мув па ант худлысат. Мув хорпи пормасан маты верэл ул, потарсайт. Касалман улты

ураңан, ёша маты ох, мув арата хойл. Там йисан ши ох муя тармал.

Ёхтылым кушайлув патан дэпат нянь па похла актам сорам дэоты даращат хоятдала лакки ортсат. Социальной за-

щита хуват холна мув нэтапса ох ёша пайтты рахал, щит элты па ястасат. Ёрая касалты па велпаслаты утциты хоятата эталтаса, мув хорпи нэпекат дэщатты мосал. Пуншты верэл щир-щира дэщатты ураңан, маты рупитты хота яңхты па хой пидан щита уйтантапсайт.

Тамиты, хар тахаятан уйтантапсайт, куша ёх ал хоятат педа ванашак удлат. Хоятлув ищи уйтты питлат, лув ант ёрэма-сайт, худсайт, ястам ясаңдал мосты таха унты ёхатсат. Нэтапсайт пидан, туты вердал ел хатмалат.

Уйтантапсайт елды холна па манты питлат. Хоты мув вер туңматты мосал, ястаты ясчат, партапсайт дэщататы па кушаята потартаты.

Зоя Куртямова
ханшам потар

Хон мувев доват агродиктант ханшса

Ас нопатты тыдащ 26-мет хатл элты 30-мет хатл унты Россия мувев доват Халдэват Пелак элты нум мув унты, хоты хоятлув удлат па лэот дэщатты ураңна мув энмалдат, иншасапса щирн нэпек ханшса.

Тампуш всероссийской агродиктант кимет пуш верыдыса. Ямал мувеван кашң куртан па вошан 38 ханшты лот дэщаттыса. Пулдават вошан мет уншак лотат Ямальной многопрофильной колледж па Заксобрание хоша пуншильдайт.

Мет умащ ус, хун агродиктант ханты ясаңна ханшса. Ши ураңна ханшты лот Канащ похалн вуды хот дыпийн верса.

Нина Михайловна Егерь потрал па иншасапсайдал руш ясаң элты ханты ясаң толмашсалды. Лув колледж хоша няврэмат ханты ясаң уталталды.

– Тамащ диктантат потарты ясаң щиран шеңк даварт ханты ясаң кератты. Ханты рут ясаң грамматика яма уйттыйн, ищи па ханты ясева понты рахал. Щиты ши ма версэм, – уталтыты нэ Нина Егерь ястас. – Ма уталтаты няврэмдам ищи щиты уталталдам. Ин па лув ма пидэман ши диктантэв ханшсэл.

Щимащ ханшапса хуват ньда, хоты муң хоятлув шоши мувев верат уйтлэл.

Иван Сандрин ханшам потар

Няврэм леккара рупитты нэ

(Олаң шупал 3-мет лопасан луңталн)

Самаңа тайты верал

Марина Прокопьевна рупатайл самаңа тайдалды. Хун кашаң няврэмат мушдал элты яммалдат, шеңк аматал. Мосты туты верал элты ситы ястас: «Йи хатл иты талат манапсат. Си пора сыс мув арат няврэм муш элты лечитсув. Полсяң, худ, ох каши пидан ант рупитлув. Соматической мушат яммалдув. Муң отделенияеван арсыр муш пидан няврэмат олдат: сый олаң, вур, сам, сахарной диабет мушат, охан па эл дыпийн энамты пувлапсайт, лон талты, щах раканты. Там пора энамты эвет па похат давление тайлат, инсультат тайты няврэмат па удлат. Муын ун хоятат мушитлат, няврэмат иси симась отан кашитты питсат. Кашаң няврэм тэдыя, рупитты хоят шимал.

Рупатаева сикуш леккарат мослат. Кашң тал нэпек китлув. Молты хоят ки вулат, туп хон мув вошат элты ёхтам леккарат. Хотан мадайт, охан сохапалайт. Муң хоятлув па нэмолтыйн.

Холна ястаты утсидам, там пора няврэмат лув сирэдан энамлат. Аңкидал-асидал лув вердал верлат. Эвет па похат атадан хув ид ант олдат, иса телефон педа вантман, хусаңа,



Хор: Альбина Тырлина

Нина опел пидан Ворңа хатадан.

охлад полтаңа йидат. Сит элты охлад кашет, давление нох манад. Дэты дэотдал па ар хорпи нэңхалан дылатман удлат. Сит элты камн хорпи мушат этлат.

Няврэмата каман аршак шушидыты, ёнты, хувшак олты, яма дэты мосал. Аңкидала-асидала эвидал-похлад пидан аршак пора хайты. Си порайн шималшак муш питад. Тумтак ёш, тумтак кур».

Марина Прокопьевна, наң волаң вер вердан. Елды педа тумтака ула, самаңа, мосмаңа тайты рупатаен елды туви. Мушаң няврэм шималшак ат ул. Тумтак ёш, тумтак кур!

Альбина Тырлина ханшам потар



Хор: Марина Подгорная

Неврэмат дуң каникула

Хашэм лапатән мет ем қатл вос. Неврэмат ақи-ачи чеднэм вертолётән мәнэт. Ашкода пора етшес. Мосэд вента мәнтыя. Мосэд руччита. Мосэд ақи-ачи нёттыя.

Темпуш кат рейса вари. Неврэмат арэт па и пуш төты кем әнтәм. Неврэмат төты кэт вөн хоят: мув ема вуты қө па неврэмат воспитатель. Туты хирет, дарэцет ема вантсайт, па вертолэта неврэмат мәнсэт.

Неврэмат пурмаслэд акэтсэт, эплэң дэгут лапкайн вусэт монета па ниңита. Мони па ниңинат юнта, чечи па ақи-ачи нётта. Чи ар вер тойлэт неврэмат.

Дуңән неврэмат ар вер тойлэт. Веды давалта нёттыя, қуд велты, вончимэт акаттыя, веды авэл вертыя онэлтата, молупсы, сак, ернас ёнта онэлтата.

Ат ема дын руччидэт, ема вент верата онэлтэдэт анкилэд-ачилэд хушна!

Галина Кечимова ханшәм потар



Хор: Галина Кечимова



Хор: Галина Кечимова

Дыл сайлаты пормасатан мадайт

Дуң порая щи йис, щипан ноптадман па тащан яңхты мохилув дыл сайлаты пормасатан маты питсайт. Регстандарт щиран спасательной жилет доңалман ул.

Йи хоттэд кат щимащ пормасан мада, муй па хут щёрас солкувайн. Вет талд юпийн туп щимащ нётоса па мада. Ин Надымской, Тазовской па Пуровской районатан улты мохет ортсайт. Катсот молтас вохапса мийман уса. Щёрас ветсот мосты пормас дутса.

2026-мет талан касдыман яңхты хоятат 25 нэмаң пормас ёша паятты верытлат. Щит паршин, нюки, кур, ул, сохалд па па хорпи мосты пормасат. Талд питщам вуш элты 4500 хоят нётоса ёша вус. Кашң хоята мосал паспорт пидан утхота яңхты па заявление ханшты. Щи юпийн туп пормасан мадайт.

Йи миллион солкувайн маты питсайт

Там талд вуш элты, Ямал губернатор Дмитрий Артюхов партам щиран, ар няврэмаң хоттэдат йи миллион солкувайн ёша маты питсайт. Няврэм ялап тал тыдащ 2026-мет тал вуш элты сэма питты вералд ул.

Мет одаңан – там маты охатан рахал округан хот лутты. Хой юр па щём тайл, верытал хот лув омасты. Ипотека вуйдыйм хоятат верытлат щи мит сохаптаты. Кимет веран – леккар вер щиран хоттэд хоят ямалдыты верытла. Леккар хот рахал Россияйн муй па па хон муван пирыты.

Хой там елпийн 500 щёрас вохидыйс, кимет шупед па ёша паятлат. Хой нэпекал ант китыдылды, социальной защита окружной департамент хоца мохты китты мосал. Региональной материнской капитал элты нын ёра кабинетан рахал луңатты, муй па 8(800)100-00-01 телефон хуват инщасты.

Аллина Тоярова ханшам потардан

Сорашак айкел моцатты ураңан

«Лух Авт» газета кашң лапат йи пуш этдыйл. Тухал ишан, ёхаттал унты талаң лапат хащал. Щи веран, сорашак айкелат моцатты ураңан, нынан мосал «Лух Авт» поныдыты айкелат «ВКонтакте» па «Одноклассники» хоца моцаттыты.

Щи ураңан там QR-код мохты доңаты, па муң верыдыты айкелдува ханшлтыяты. Кимет веран, айкел луңатты тумпийн, щита рахал ясаң ханшты, потран сама ки рахас – пос понты.

Муң па, нын вантам айкелдан элты ищи нопсэв тыед-тохед понылдылэв, вантлэв – мата айкелат па муй элты хоятат луңатты лаңхалат.

Тумтак ёшна, тумтак курна ханты мир улапсаев ияха понасан елды тулэв, ханты мир ясэв шавилэв!



ОБЪЯВЛЕНИЕ

Там QR-код хуват доңаты па вантаты, муйсыр нётоса сайт СВО хоца улты мохета мадайт. Щи тумпийн нэңдала, няврэмдала, ақидала па ащилала ищи нётоса вуты рахалд.



СЛУЖБА ПО КонтРАКТУ В ВС РФ

Полная информация по телефону: +7 (902) 816-11-90, +7 (34922) 3-98-08. Звонок по России бесплатный.

ВРЕМЯ ДЛЯ ВАЖНЫХ РЕШЕНИЙ!

КонтРАКТНАЯ СЛУЖБА
6 700 000 Р
 Единовременная выплата
4 000 000 Р

При заключении контракта на Ямале:

- Прибыльщики из других регионов возмещаются затраты на проезд от места проживания до г. Салехарда.
- В период оформления проживания в г. Салехарде и 3-разовое питание предоставляется бесплатно.

ОБУЧЕНИЕ:

- ✓ операторов беспилотных летательных аппаратов
- ✓ тактическая боевая
- ✓ медицинская подготовка

3 600 000 Р ежемесячные выплаты
 до 120 000 Р при нахождении в зоне СВО

400 000 Р ежемесячные выплаты
 до 120 000 Р при нахождении в зоне СВО

ЕЖЕМЕСЯЧНЫЕ ВЫПЛАТЫ ПРИ НАХОЖДЕНИИ В ЗОНЕ СВО ОТ 225 Т.Р.

Вещката верты рупатайңан



Лазарь Михайлович рупатайл шеңк самаңа тайдалды.

Хащам лапатан аматты айкедан ёхатсаюв. АНО «Ямал-Медиа» хоңа рупитты ху Андрей Швецов «Новая реальность» мир доват манам касапсайн «Говорящий с природой» верам кинайл пидан олаң тахая этас. Рупатайл «Человек и природа» номинацияйн волаң мойлапса шитас.

Нёхты хорадан Лазарь Михайлович Еприн элты потар манад. Лув Щаня муван сёма питас, щита энмас па ашкулдайн уталтыйс. Охотовед рупата пела уталтымал юпийн, «Йиңки дор» войт шавиты харан ар тал рупитал. Там ханты хоятэв рупатайл шеңк самаңа тайдалды. Ханты муван энамман, ай тэдан войт хоңа уталман ул. Щи вой энмалты па шавиты харадан хувалта тувам овцебыкат, як па бизон нёмп ми-сат, доват улдат. Щитлад элты вантман, торанан, содан понман, шукадам пушас лэщатман, Лазарь Михайлович куран, хота па дов шаншан кашң хатл ар километра яңхилдыл.

«Едпи ад хоятат тый ант эсдысайт. Там йисан па арсыр экологической юшат пунш-сайт. Хор вуйман па ад шушидыты хоятат щутщаты ёхтыдылат. Щи кеша тата ат холты па лёхитыты хотыет омассайт. Луң сыс волонтера рупитты айлат ёх тата улдылат. Вератты кеман пушаслуд лэщатлат. Лэвас хоят войт хоңа вана ант эсаллуд. Манэм тата, хар тахайн ям рупитты. Войдам пидан потрэмидам. Лув па ма тур сьем хоңа уталсат. Вана йилат», – Лазарь Еприн ястас.

Хор вуйм порайн, Максим Сандрин рупитас. Лув Пулцават вош элты. Нёхты хор вуты хоята АНО «Ямал-Медиа» хоңа рупитал.

«Верты рупатаем самама шеңк рахал. Хор вуйман, тухал ишан лаварт куш улдыл,



Андрей Швецов па Максим Сандрин.



туп ищипа матты ки ма щутщалам. Ма ащем пидан ай тэдан акидам па имайлам хоңа тащ хотата па куртата яңхсам. Вой па худ ведпаслаты рупата уйтлэм. Хун тамащ тахаята хор вуты яңхлуд, лыпеман амтатдыдам.

Йиңки доран нёхты хор вуймеман еша ощхуль ус. Тухал хордам нумалта вантты щиран версалдам. Щи кеша квадрокоптер



Хор: Лазарь Еприн

Хор: АНО «Ямал-Медиа»



Йиңки доран энамты па улты войт.

Хор: Фёдор Воронов

тайлуд. Хошапем вана ёхаттадан, войлуд паканлат. Муңев, ванты, мосас, войлуд ещалт ат хухалдат, лув па шаншан манлат. Щит ураңан хорам кина тыйты ураңан, ар пуш хор вуты мосас.

Кинаев талаңа йитад ураңан ар хоят рупитал. Мет волаң куца – щит номас понам хоятэн. Щалта хор верты, машинайн рупитты, хор па сый похла акатты хоятат па улдат. Вет-яң минут хорам хор вантты ураңан, талаң лапат, хота па тыдащ рупитты мосал», – рупатайл элты Максим Сандрин потартас.

Там кина тумпийн, арсыр касапсаята пилтащийм рупатайт олаң местаята па этдысат. Щимащ рупатаятан хор вуйман, Максим ищи ус. Рупатайл самаңа туты айлат похев холна ар хорам нёхты хор ат верал. Ханты хоятлуд, нёмлад мир доватан ат щащдат па иса ат уйтлайт.

Зоя Куртямова ханшам потар

Ими Хилы па Меңкат

(Олаң шупал № 22 лунтадн)

Ими Хилы ястал:

– Вуца вердан ки, наң ши вердан.

Карты харал тум олңа лойс. Тыел вуца верман ши йил. Ши йитал элты хилэдан лэпалмаса – карты юца ши педас.

– Наң верэн ши, парас.

Нёхи шукал антом, тапар шукал антом.

Щалта кат охпи Меңк этас. Ищи карты хар верты потартал. Молтэд воцкас, кат хоят ёнтты ловат карты хар тыйс.

– Хилые! Вуца вердаман!

– Ма вантсэм хун, молты щиран вуца верыдыла. Вуца вердан ки, наң ши вердан.

Кат охпи Меңк ики тум олңа ши манас. Тыел вуца верман ши хатад. Ими Хилы лэңки ям тахая шомая лойс. Меңк ики щиты хаттал элты, роман курал тахрамтас, ил ваңкрамтас па карты шуп юца ракнас. Ши ракнам тахаядан ант па нёхлдыйс.

Ин па хулам охпи Меңк ики ты этмас. Ищи карты хар верты вуратас. Вуца верты питсаңан. Ин от Ими Хилэдан лэпалмаса:


– Вуца верты хун хошдам.

Ин Меңк ики ищи карты юца педас, ара тохас.

Щалта Ими Хилы ун тут адас па ин отат тута шарытсайт:

– Ханты ху йис турам тыйтыйн, тамащ молты хатнэху шукатты от ант ат ул.

Нохлы манам султамат нох ант эсалсалды, илды манам султамат ил ант эсалсалды. Ёхлы хащам султамал нохлы вуцатас. Ши элты, таңха, ханты ху Тураман,



Хор: Иван Сандрин

тухал ёх хоятэн, тухал нэ хоятэн ши ул.

Щитлал етшасат, акел ики хоца ёхи лоңас.

– Антом, – ястал, – па хун Турам овты питал. Ям Турам каншам ёхдан атом Турма питсат.

Нови тушпи, нови охпи икел пидан па лэс-йиншас. Акел ики па ястас:

– Там нэпеклан наңена ши хайдалдам. Ханты ху йисаң Турам тыял па ши мув хоца куца наң уда. Тацен, щунен

иса ант ат ходал. Хулам хот щуңен войен тэдыя ат ул, йи щуңен тал ат ул. Тал щуңен ханты хуйн, ханты нэңан тэкнаптаман ат тайда.

Нови тушпи, нови охпи ики щиты ястас па холты педас ши воцамтас. Лув муй Турма питас, лув муй мува питас, хойн уйтла.

Ими Хилы лэңки хопала нык манас, ёхлы манты ши сонтамас. Хулам охпи Меңк имел хот вуша ёхтас, вуты хойс. Ин Меңк имелан шияласа:

– Хилые, юва, вунш хул лэва!

– Наң ям нэ ки усан, молхатад ма самем вохам порайн сэңкман ким холты тусэн. Ин лэтотан шашлэн. Щиты хун вер ул!

Ин ими лэңки катлапса, хоп юпийн ярса. Елды довадмас. Меңк ими ши сыйман тула.

– Там Асан нэ вушара уда, хоята ал кетма. Тыел манты хуен, тохел манты хуен ат вантыйл, хоты наң Асэн лемпилэн.

Кат охпи Меңк ики имен хоца ёхтас. Ин от охсохдал элты нярэмасды.

– Манэм шукатсэн.

Хоп юпийн ярапсалды. Ин ими волды шакнас.

– Ищи, – ястал, – вушара уда там Ас мувен хоца.

Ун сорт ведам Меңк имел хоца ёхтас. Ин отал хилэл увадтас:

– Хилые, юва, сортэн йи пелкал няр худа лэви!

– Молха самем вохам порайн манэм донщ сэңкты нарэпан сэңксэн, ин па лапатты вохлэн. Ма наңен сары этадталэм, муй тахайн наң улты тахаен.

Кур пелкал элты катлапса, хоп юпийн ярапса. Ищи вушара нэматса.

Ёхи ёхтас. Имел ими хулам хот щуңал ил рохняпмел. Йи хот щуңадан тутал лэщтоман омасал. Тутал йи сэмие хащамал. Вана шушмас, тут сэм лап хуртапса.

– Имем ими, ал лявта, ма ёхатсам!

Ин от нох шуңхсалды, хухалмас па ай эви ловата йис. Тал шовар сахан, луң шовар сахан луматдыман ул.

Нови тушпи пирац ики – щит Турам ащел ши улмад. Ими Хилы ин там унты ун хоятэв.

Любовь Возелова нэпека лэщатам монц



Хор: Иван Сандрин

Мет сыйң па амтаң хатл

Луң ёхатты порайн, олаң хатлаң мет сыйң па амтаң! Ущ тылащ олаңмет хатлаң мир доват улты няврэмат емаң хатла постаман ул. Кашң эвие, похие ойң ат ул, сыстам турама идшийн ат энамал, ёдан аңкелан, ащелан ат лавадла па ван рут хоятлаңан шави-ман тайда.

Ун хоятат кеша нын мет тынаң пошхийет. Ашкудайн яма уталдытан порайн, касапсайн нох питтанан, кашң ям вер вертыйн, нын ки аматлаты, муң па нын пиланан аматлув. Нынан яма улты, тумтак энамты ураңан, аңкет, ащет атаң-хатл рупитлат.

Там йисан, няврэмат кеша тэдыя ёнтты па касты харат, уталдыты хотат пуншлайт. Яма уталдыты эвет, похат охан сохаптадайт, арсыр муват педа уталдыты па щутщаты тутдыдайт.

Тампуш, емаң хатл кеша кашң вошан па куртан ёнтты па касты харат рупитсат, нёхты хорат этадтасайт. Лапатнаңк вошан, щутщаты кеша лэщатам харан йиңк щёшиты фонтан рупитты питас. Охсар куртаң каркам похат мотоциклан кассат. Пулцаватан похат па эвет нёл эсадман па алдыты кешийн сэңкатман юрацсат. Хойтат велосипедан хатэмисат, тухлат ёнтты харан навратдысат. Ноябрьск вош эвет па похат щи хатадан оляпан хор нёсытты этдысат.

Ин ашкуда пора етшас. Каман хошма йис. Хой хошам муват па щарас педа ант манас, улты вошладан щутщадат. Улты мувеван ищи ям. Вошлув, куртлув хорамаңат, сыстамат па камн паптап шеңк антом.

Няврэмийет, тумтака удаты, луң сыс яма щутщаты, юр актаты, энматы. Ялап духсат уйтаты, катра пилдан ал ёрматы!

Зоя Куртямова
ханшам потар



Хор: Раиса Пыррасева



Хор: Зоя Куртямова



Хор: vk.com/bt_yamao_ru



Хор: Зоя Куртямова



Хор: Татьяна Топрова



Хор: Зоя Куртямова



Хор: vk.com/bt_yamao_ru



Хор: Наталья Ребас

Газета
«ЛУХ АВТ»
Адрес редакции:
629003, ЯНАО,
г.Салехард,
мкр. Богдана Кнунянца,
д. 1, каб. 106
+7 (34922) 4-68-63
E-mail:
luh.avt@yamal-media.ru

Учредитель
Департамент внутренней политики
Ямало-Ненецкого автономного округа
(629008, ЯНАО, г.Салехард, пр-кт Молодёжи,
д. 9, каб. 708)

Газета зарегистрирована
Управлением федеральной службы по надзору
в сфере связи, информационных технологий
и массовых коммуникаций по Тюменской
области, ХМАО-Югре и ЯНАО
19 апреля 2012 года
Регистрационный ПИ № ТУ72-00558

Тираж 1300 Заказ 197 тз
Подписные индексы:
на год – ПА700, на полугодие – ПР561

№ 23 (1326)
Газета вышла в свет 6 июня 2026г.
Подписано в печать 4 июня 2026г.
по графику: 16.00
фактически: 16.00
Газета выходит по субботам

Цена годовой подписки 88 руб.,
в розницу не распространяется

Издатель
Департамент внутренней политики ЯНАО
(629008, ЯНАО, г.Салехард,
пр-кт Молодёжи, д. 9, каб. 708)

Отпечатано в АНО «Ямал-Медиа»
Юридический адрес: 629003, Ямало-
Ненецкий автономный округ, г. Салехард,
мкр. Богдана Кнунянца, д. 1, каб. 106
Фактический адрес: 629007, Ямало-
Ненецкий автономный округ, г. Салехард,
ул. Чубынина, д. 39А

И. о. генерального
директора
АНО «Ямал-Медиа»
Каврук
Татьяна Ивановна

Главный редактор
Яковлева
Алина Кирилловна